

Evening Dogri News Bulletin, 25 July 2024

इवनिंग डोगरी न्यूज़ बुलेटिन

समे-18:15 Hrs

Headlines

- 1 लेफ्टिनेंट गवर्नर मनोज सिन्हा होंरें विद्यार्थिं गी आखेआ ऐ जे इच्छेया ते पक्का निश्चे दऊं ऐसियां महत्वपूर्ण चीजां न जेहिडियां मौकें दा लाहू ठोआने ते विकसित भारत लेई जोगदान देने च उंदा मार्गदर्शन करडन।
- 2 प्रधानमंत्री नरेंद्र मोदी होर 25में कारगिल विजय दिवस च शिरकत करने लेई कल कारगिल दा दौरा करडन। इस मौके ओहू शिनकुन लॉ सुरंग लेई वचुअर्ल तरीके कन्नै पैहला धमाका करोआडन।
- 3 सेनाध्यक्ष जनरल उपेंद्र द्विवेदी होंरें कुपवाड़ा जिले दे केरन सैक्टर च कब्जा रेखा कन्नै लगदे अगेत्रे लाहूकें दा दौरा लाया।
- 4 जम्मू-कश्मीर पुलसै कठुआ जिले च आतंकवाद सरबन्धी गतिविधिं गी समर्थन देने लेई दऊं ओवर ग्राउंड वर्कें गी अज्ज गिरफ्तार कीता ऐ।

<><><><><><>

LG-TUST

लेफ्टिनेंट गवर्नर मनोज सिन्हा होंरें आखेआ ऐ जे इच्छेया ते पक्का निश्चे एहू दौनें चीजां मौकें दा फायदा ठोआने च विद्यार्थिं दा मार्गदर्शन करडन ते कन्नै राष्ट्र निर्माण च लगातार जोगदान बी देडन। उनें आखेआ जे एल्लै जम्मू-कश्मीर दा शिक्षा दा खेत्तर बड्डे बदलावें दा गवाह बनै करदा ऐ ते उनेंगी मेद ऐ जे इस्लामिक युनिवर्सिटी ऑफ साईंस एंड टेक्नोलॉजी अवंतीपोरा पूरे प्रदेश च ज्ञान ते नमिं काहडें दी इक मशाल साबत होग। युनिवर्सिटी दे त्रीये दीक्षांत समारोह गी संबोधित करदे होई एलजी होंरें आखेआ जे उनेंगी इस गल्लै दी खुशी ऐ जे जेहडे 27 विद्यार्थिं गी अज्ज गोल्ड मेडल मिले न उंदे चा 22 कुडियां न। एलजी होंरें आखेआ जे विद्यार्थिं गी लोडचदा ऐ जे ओहू मकामी चुनौतिं कन्नै निब्बडने लेई अपनी प्रतिभा च निखार आहन्नदे रौहन तां जे देसै दा भविक्ख उज्जवल ते खुशहाल बनै।

<><><><><><>

LG-Hakla

लेफ्टिनेंट गवर्नर मनोज सिन्हा होंरें मन्ने-परमन्ने दे गुज्जर नेता, समाजी कार्यकर्ता ते लखारी मरहूम वजीर मोहम्मद हकला पुंछी हुंदे चेत्ते च कल इक यादगीरी डाक टिकट जारी कीती। अपने भाषण च एल.जी होंरें गुज्जर-बकरवाल समुदाय दे समाजी ते आर्थिक विकास च वजीर मोहम्मद हकला पुंछी हुंदे योगदान गी चेत्ता कीता। पुंछ होंरें राष्ट्री एकता लेई बडी महत्वपूर्ण भूमिका निभाई ते समाज दे कमजोर तबकें गी अबडा चुक्ने लेई अपना पूरा जीवन समर्पित करी दित्ता हा। उनें सदा गै पट्टी दर्ज जनजातिं दे अधिकारें दी राक्खी दी हिमायत कीती ते गुज्जरें-बकरवालें गी पट्टी दर्ज जनजाति दा दर्जा देने दी मंग गी लेइयै आंदोलन दी अगुवाई बी कीती। एल.जी होंरें वजीर मोहम्मद हुंदे कम्में पर लो पाई ते आखेआ जे उनें म्हेशां राष्ट्र निर्माण ते निस्वार्थ सेवा दी वकालत कीती। उंदे कदमें दे निशान पर अगगे बधदे होई गुज्जर-बकरवाल समुदाय नै इस म्हान देश दी सुरक्षा ते विकास च बेशकीमती जोगदान दित्ता ऐ। एलजी होंरें आखेआ जे प्रधानमंत्री नरेंद्र मोदी हुंदे नेतृत्व तैहत उंदा प्रशासन समाज दे हर इक तबके, खास करियै जनजातीय समुदायें दे अधिकारें दी राक्खी यकीनी बनाने लेई कम्म करोग।

<><><><><><>

PM-Kargil

प्रधानमंत्री नरेंद्र मोदी होर 25में कारगिल विजय दिवस दे मौके पर कल कारगिल वार मेमोरियल दा दौरा लाडन ते देसै लेई सर्वोच्च बलिदान देने आलें गी श्रद्धांजलि अर्पित करडन। श्री मोदी होर शिकुन लॉ सुरंग परियोजना लेई वर्चुअल तरीके राहें पैहला धमाका बी करोआडन। दऊं सुरंगें आली इस 4 इशारिया 1 किलोमीटर शिडकै दा निर्माण नीमू पादुम दारचा शिडकै पर तकरीबन 15 ज्हार 800 फीद दी उंचाई पर कीता जाहग ते एहू लेह तोहडी सब्बनें मौसमें दरान चालू रौहने आला राबता उपलब्ध करोआग। बनियै तैयार होई जाने पर एहू दुनिया च सब्बनें शा उंचाई पर स्थित सुरंग होग। एहदे राहें थेआरबंद बलें दी तेजिआ कन्नै आओजाई ते लहाख दा आर्थिक ते समाजी विकास यकीनी बनोग।

<><><><><><>

Kargil

कारगिल विजय दिवस दी 25मीं बरे गंड शा इक् दिन पेहले द्रास दे लामोचेन प्वाइंट उप्पर इक कार्यक्रम दा आयोजन होआ। एहदे च जंग लड़ी चुके दे साबका फौजियें, सुरक्षा बलें ते रिश्तेदारें ते मुकामी लोकें हिस्सा लैता। कारगिल विजय दिवस दी रजत जयंती दे शानदार समारोह दी मेजबानी करने लेई द्रास दा युद्ध स्मारक पूरी चाल्ली तैयार ऐ। कल होने आहले इस भव्य समारोह च प्रधानमंत्री नरेंद्र मोदी होर बी शिरकत करडन ते देश दी रक्षा लेई अपनी जिंदु दा बलिदान देने आहले वीरें गी श्रद्धांजलि अर्पित करंगन। समारोह दे मद्देनजर सुरक्षा दे निगगर बंदोबस्त कीते गेदे न ते कारगिल दे डिप्टी कमिशनर होरें द्रास ते कारगिल तहसीलें च ड्रोन दी मनाही दे आदेश जारी कीते न। इनें लाहके च विजन माहनू आहली यू.ए.वी डोआरियें उप्पर बी प्रतिबंध लाई दिता गेदा ऐ। कारगिल विजय दिवस, कारगिल युद्ध दौरान मुख्य दी रक्षा लेई अपनी जिंदु दा बलिदान देने आहले वीरें दी याद च आयोजित कीता जंदा ऐ।

<><><><><><>

EPMKN

देश दे बक्ख-बक्ख हिस्सें च चला'रदी मुहिम एक पेड़ मां के नाम तैहत साम्बा जिले च जिला विकास कौंसल दे प्रधान केशव दत्त शर्मा होरें गौरमैंट हाई स्कूल महाल शाह च रूक्ख-बूहटे लाने दी मुहिम दी शुरूआत कीती। स्हाड़े संवाददाता सतपाल शर्मा हुंदे कन्नै गल्ल करदे होई डीडीसी प्रधान ते स्कूल दे किश विद्यार्थियें गलाया।

<><><><><><>

RS-US Asvisory

सरकार नै गलाया ऐ जे उसी अपने नागरिकें दी जम्मू-कश्मीर ते देश दे होर दुए हिस्सें दी यात्रा दे सरबंध च अमरीकी सरकार आस्सेआ जारी कथित दिशा-निर्देशें दी कोई जानकारी नेई ऐ। अज्ज राज्यसभा च कांग्रेस लीडर दिग्विजय सिंह हुंदे आस्सेआ पुच्छे गेदे पूरक सवालें दा परता दिंदे होई केंद्री सैलसफा मंत्री गजेन्द्र सिंह शेखावत होरें गलाया जे अमरीकी नागरिकें गी देश च किश हिस्सें च यात्रा नेई करने सरबंधी दिशा-निर्देशें बारै सरकार गी जानकारी नेई ऐ ते दफा-370 दे हटने मगरा यात्री विजन कुसा डर-त्राह दे जम्मू-कश्मीर दी यात्रा करा'रदे न।

<><><><><><>

Army-Chief

सेना प्रमुख जनरल उपेंद्र द्विवेदी होरें अज्ज कुपवाड़ा जिले दी नियंत्रण रेखा सनें अगेत्री चौकियें दा दौरा लाया ते सेना दे कमांडरें ते जवानें कन्नै गल्लबात कीती ते सुरक्षाबलें आस्सेआ घुसपैठ ते आतंकी वारदात उप्पर काबू पाने लेई कीती जा'रदियें तैयारियें दा जायजा लैता। सेना प्रमुख, सेना दे जवानें दी पूरी धनदेई कन्नै अपने कर्तब दी पालमा करने लेई सराहना कीती। उनें जवानें गी हर परिस्थिति च सतर्क रौहने लेई आखेआ। एहदे मगरा सेना प्रमुख होर कारगिल लेई रवाना होई गए जित्थे कल ओह कारगिल विजय दिवस समारोह च शामिल होडन।

<><><><><><>

Army-Chief Homage

सेनाध्यक्ष जनरल उपेंद्र द्विवेदी होरें कुपवाड़ा जिले च टाक्करे दरान शहीद होए दे नाईक दिलावर खान होरें गी अज्ज श्रद्धांजलि अर्पित कीती। एह श्रद्धांजलि कार्यक्रम श्रीनगर दे बदामी बाग च चिनार कोर दे हैडक्वार्टर च लोआया गेआ। फौज, सिविल ते पुलस दे आला अफसरें बी एहदे च हिस्सा लैता। नाईक खान होरें हिमाचल प्रदेश दे ऊना जिले दे बसनीक हे। ओह जंदे रोज छिड़े दे टाक्करे च गंभीर तौर पर जखमीं होई गए हे ते मगरा उनें ईलाज दरान दम त्रोजी दिता। मंगलवार संझा शुरू होए दे इस टाक्करे च इक बेपंछानू आतंकवादी मारेया गेआ हा। जंदे बुधवार थमां गै गोलीबारी रूकी गेदी ऐ पर लाहके च सुरक्षाबलें दा अभियान अजें बी जारी ऐ।

<><><><><><>

LG-Homage

लेफ्टिनेंट गवर्नर मनोज सिन्हा होरें कुपवाड़ा जिले च आतंकवाद रोधी अभियान दरान सर्वोच्च बलिदान देने आले नाईक दिलावर खान होरें गी श्रद्धांजलि अर्पित कीती। एल.जी होरें आखेआ जे ओहू राष्ट्र लेई बलिदान देने आले इस शहीद दी दलेरी गी नमन करदे न ते उंदे बलिदान गी कदे बी भुलाया नेई जाग। उनें आखेआ जे दुखे दी इस घडी च पूरा देश शहीद दे परोआर कन्नै खडोते दा ऐ।

<><><><><><>

OGW-Kathua

आतंक विरोधी गतिविधियें उप्पर रोक लाने दे यत्रें दे चलदे कठुआ पुलस नै आतंकी गतिविधियें दा समर्थन करा'रदे दऊं ओवर ग्राउंड वर्करें गी गिरफ्तार करी लैता ऐ। स्हाड़े जिला संवाददाता प्रदीप शर्मा होरें जानकारी दित्ती ऐ जे गिरफ्तार कीते गेदे दवें जनें उप्पर एहू बी दोष ऐ जे उनें समें उप्पर जरूरी जानकारी पुलस कन्नै सांझी नेई कीती। इस मामले च 100 थपमां बद्द लोकें थमां पुच्छ-गिच्छ कीती जा'रदी ऐ।

<><><><><><>

Rijju

पार्लियामानी मामले दे मंत्री किरण रिजिजू होरें विपक्ष दे लीडरें उप्पर दोष लाया ऐ जे ओहू लोकें आस्सेआ दित्ते गेदे जनादेश दा अपमान करा'रदे ना। नमीं दिल्ली च पत्रकार सम्मेलन दौरान बोलदे होई मंत्री होरें गलाया जे देश दे लोक एहू दिक्खना चाहंदे न जे बजट उप्पर इक सार्थक चर्चा होये पर विपक्ष दे किश लीडरें दी टिप्पणी कन्नै सदन दी गरिमा गी डगाई दित्ता ऐ। उनें विपक्ष गी लोकें आस्सेआ दित्ते गेदे जनादेश दा सम्मान करने लेई गलाया। प्रधानमंत्री नरेंद्र मोदी हुंदा हवाला दिंदे होई रिजिजू होरें आखेआ जे चुनां हुन खत्म होई गेदे न ते हुन स्हाड़ा उद्देश्य विकसित भारत दे लक्ष्य गी हासल करने ते केंद्री बजट उप्पर रचनात्मक चर्चा करना होना लोडचदा ऐ। पार्लियामानी मैहकमे दे मंत्री होरें विपक्ष दे लीडरें उप्पर दोष लाया जे ओहू बजट उप्पर किश नेई बोला'रदे ते छडी सियासत खेड्ढा करदे न ते प्रधानमंत्री नरेंद्र मोदी हुंदा अपमान करा'रदे ना। उनें आखेआ जे बजट दा उद्देश्य देश गी त्री बड्डी अर्थ बवस्था बनाना ऐ ते इस बजट च करसानें, महिलाएं दे कन्नोकन्नी हर क्षेत्र दे विकास उप्पर ध्यान केंद्रित कीता गेदा ऐ। मंत्री होरें आखेआ जे जेकर विपक्ष नेई सझग तां देश दी जनता उनेंगी एहदी सजा जरूर देग। उने ंआखेआ जे प्रधानमंत्री नरेंद्र मोदी होरेंगी त्री बारी प्रधानमंत्री देश दी जनता नै गै बनाया ऐ ते विपक्ष गी इस गल्ला गी मन्त्री लैना लोडचदा ऐ।

<><><><><><>

LS-Udhyam

लौहके, भलेयां लौहके ते दरम्याने दर्जे दे उद्यमें सरबंधी मंत्री जीतन राम मांझी होरें अज्ज लोकसभा च जानकारी दित्ती जे 1 जुलाई 2020 तगर 18 करोड़ शा बद्द रोजगार आहले तकरीबन 2 करोड़ 77 लक्ख उद्यमें, उद्यम पोर्टल च पंजीकरण कराया ऐ। इक लिखित परते च मंत्री होरें एहू जानकारी दित्ती।

<><><><><><>